



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma : Tir Yimyim

tiryimyim@aolima

tir yimyim

TAPAK 8

Kharge-i Red Fort sentong nung shilem magi; Congress office nung

Vinesh Phogat Asian Games nung masayatetsü

VOL. XX NO. 304 (ADOK 304)

DIMAPUR RASEMNÜ (WEDNESDAY)

LUROI (AUGUST) 16, 2023

₹ 5.00

77 buba Independence Day nung Naga yimten latettsü tayongzükba agütsü

Kohima, August 15, 2023 (TYO): Nagaland nung 77 buba Independence Day amongdang Naga yimten teloktem, sendaktepa alirtem aser Centre dang Naga yimten latettsü tayongzükba agütsü.

Mongulbarnü Secretariat Plaza nung Independence Day benjungmong nung Chief Minister Neiphiu Rio-i iba tayongzükba agütsü.

“Onoki tekaratiba nung Naga yimten latettsü atema nangzükba nung noktaka lir aser iba ya ozü sorkar indang tongti teinyaktsü rongnung ka lir” ta pai ashi.

Cabinet züngsem ajanga den Cabinet nung madenba kintem nungi MLA tem dena Political Affairs Committee tentetogo aser iba ya yimten yakta latettsü atema sendaktepa alirtem den jembitsü atema tentetba lir, ta CM Rio-isa ashi.

Forum for Naga Reconciliation (FNR) ajanga September 2022 nung NSCN-IM aser Naga National Political Groups (NNPGs) tsüngda joint accordant sign sütepa sülen Naga nungeri teimla ulushio go ta paisa metetdaksü.

“Taküm January ita telok anaprongi India sorkar den Naga yimten latettsü nangzükba akangshitepa liasü. Anungji Naga yimten telok ajak, sendaktepa alirtem aser India sorkari ken o tem angatetteptsü aser memenui yimten latettsü ayongzükba” ta Rio-isa ashi.

“Eastern Nagaland Peoples’



August 15, 2023 nü Secretariat Plaza nung Chief Minister Neiphiu Rio-i Independence Day benjungmong nung parade contingents sema aodang agiba noksa angur.

Organisation (ENPO)-i eastern district tem nung alirtem tebilemstü lemsatepa arur aser parnoki takhangba kar agütsüba India sorkari reprangdar. Eastern district tem nung alir terenlok alitsü aginüba onokia pusema arur” ta pai metetdaksü.

Supreme Court-i Urban local Bodies (ULB) atema tetuyuba agütsüba sülen kin hohotem aser civil society organizations aikati iba ajanga Arria 371(A) nung kongshitsü ta tebilemstü lemsatep. Nagaland Legislative Assembly-ia nübortem taginüba ama ULB elections magitsü lemtet aser Act agien, ta Rio-i ashi.

“Onoki sendaktepa alirtem dang asüngdangtepa Act tasen ka yanglutsü mapa inyakdar aser iba nung nisung ajaki yaritepdaktsünür, ta paisa shisem.

Linük nung Uniform Civil Code (UCC) benoktsü atema nisung aikati tebilemstü benogo aser Nagaland nung alirtem taginüba nung ajemdaker State

Cabinet-i Law Commission dang UCC kübok Nagaland medendaktsütsü ayongzükogo, ta CM Rio-isa metetdaksü.

Külen, Union Home Minister-ia Nagaland Council of Ministers dang UCC ya Nagaland aser North East nung aliba Scheduled Tribes dak mekongshitsü nangzükogo, ta paisa ashi.

Nagaland tekaraba nung renloksü atema Kohima nung April 2023 nung G20 Business Meet takok ngua agiogo. Iba mapang National aser International Business delegates-i Rs 4,500 crores endoka Nagaland shishilembatsü jembitepogo, ta paisa ashi.

Manipur nung tensa kanga mejungi akümba atema temulung raksar aser iba ajanga Nagaland nunga kongshio go. May ita tetenzüklen Naga nunger kaketshir aser senso 1300 tema anir aru, ta CM Rio-i ashi.

“Manipur nung nisungtem dak tashiyim inyakba, kiojen

raksatsüba aser tekülem kitem rongdoktsüba atema süoki ia bilemer. Ajisiüka tensa süngjema akümtsü aser yimjung arutsü asenoki imlar. Manipur nung kin aser telok balala dang yimjung alitsü atema olemtep lia angatetteptsü mepishir” ta paisa metetdaksü.

“Nagaland PWD (R&B) Department-i PMGSY (rural roads) kübok gari lenmang 4,100 kilometers aser apu 53 tema yangluogo. Taküm financial year nung India sorkar kübok schemes aser projects balala ajanga Rs. 2,000 crores endoka Nagaland nung gari lenmang 1200 kilometers tema yanglutsü” ta CM Rio-i ashi.

State PWD (NH) nem lemzükba National Highways atema mapa inyakdar aser gari lenmang 330 kilometers tashi yanglushitsü, ta paisa shisem.

Nagaland nung mezüngbuba medical college- Nagaland Institute of Medical Sciences &

Research (NIMSAR) academic session 2023-24 nungi 100 MBBS seat atema lapoktsü. Maneni Mon Medical college atema mapa inyakdar, ta Chief Minister-isa ashi.

Urban Development Department-i Nagaland nung yimti tasen ka yanglutsü atema Ministry of Housing and Urban Affairs dangi detailed proposal ka yokogo, ta paisa ashi.

Iba yimti tasen yanglutsüba ya Chümoukedima district kübok Chathe Valley nung lir aser ali tasazük 39 sq.km lir, ta Rio-i ashi.

Underdeveloped Area Programme (UDAP) kübok Department of Underdeveloped Areas-i financial year 2022-23 nungi tenzükba eastern district 6 nung mapatong balala tenzükogo, ta Rio-i metetdaksü.

“Onoki Centre sorkar den tekaratiba nung Foothills Road (Trans-Nagaland Highway) yanglutsü atema jembidar. Onokisa Nagaland nung mezüngbuba inland waterway corridor National Waterway-101 (Tizu-Zungki river) yanglutsü atema inyaker” ta CM Rio-isa metetdaksü.

“Onoki War on Drugs tashitaitba kümdaktsütsü atema bangzüngogo. Arogotem, Village Councils aser sendaktepa Department tem külemi iba khuret asen loktiliba nungi agientsü” ta pai ashi.

Iba sentong nung CM Neiphiu Rio-i eOffice aser eVigilance applications lapoktsü.

Independence Day 2023 nung sempet angurtem

Dimapur, August 15, 2023 (DPRO): Nagaland nung Independence Day 2023 amongdang President's Police Medal aser Police Medal angurtem.

1. Tsenpemo Kikon, Asst. Commandant, Chümoukedima, Nagaland (President's Police Medal)
1. Yanrenthung Nguillie, Commandant, Phek, Nagaland & Sonia Singh, Special Secretary, Nagaland (Police Medal for Meritorious Service)

Announcements was made for Governor's Gold Medal awardees:

1. Kathyinla EAC Noklak
2. Meripeni Addl. State Protocol Officer Home Department (GAB- II)
3. Vikeshe Chuse Dy. SP, Nagaland (Lokayukta).

I. Governor's Gold Medal announced on Independence Day 2022.

1. Rajkumar M, IFS, DFO, Kohima
2. Er. Kewizun Zeliang NPS, Addl.SP (Comm) NPTO
3. Er. Y. Akito Sema, E.E. Electrical Division, Dimapur.
4. Dr. Nyanthung Kikon, Dy. Director & State Nodal Officer, IDSP Republic Day 2023

II. Governor Gold Medal announced on Republic Day 2023.

1. Er. P. Tiakaba Yimchunger, JE Transmission Division Dimapur
2. Dr. Anungla Imdong Phom,

Addl. Director DUDA.

3. Aotula T. Imchen IPS, SP Wokha III. Correctional Service Medal for Meritorious Service.

1. Dr. Oben Yanthan, Jailer, Central Jail Dimapur

IV. Aasadhan Aasuchana Kushalata Padak Award 2021.

1. K. Poman Konyak, ASI, DEF Mon

V. Governor's Commendation Certificate 2023.

1. Nockpai Konyak, SDO (C) Sadar, Kohima

2. Wongto Chingmak, SDAO, DAO Tuensang

3. Dr. Akato Sema Dy. CMO, Zunheboto.

4. Nounesenuo S. Iralu, Dy. Project Director, Planning & Transformation, attached to P&AR (PIMS)

5. Tsupithong Y. Yimchunger, Economics & Statistics Officer, Dte of SE.

6. Chichamo Kikon ASI, IGP(INT), establishment

7. Kevepfulu-u Ritse, ASI, CP Dimapur

8. Hav. Talirenba Mozer, Office of the Commissioner of Police Dimapur

9. Bhaktalal Giri, Scaleman, office of the assistant director F&CS Mokochung

10. M. Yankiuba, Peon, office of the Deputy Commissioner, Tuensang.

11. K. Thou, Peon Planning & Transformation.

India-i Manipur nunger den noktaka lir: PM Modi

New Delhi, August 15, 2023 (Agencies): Prime Minister Narendra Modi-i Red Fort nung 77 buba Independence Day onük jembidang India-i Manipur nunger den külemi noktaker aser khurettem ajak koktettsü ta metetdaksüogo.

Manipur nung mepetmesü mapang ka ajurua liasü aser tetsürtem dak tashiyim inyakba osangtem angazükogo saka tangbo yimjung nung lir aser iba ya tejakleni bener aotsü ayongzükba, ta pai ashi.

State aser Centre sorkar külemi khurettem koktettsü meranger aser maneni inyaktsü, ta PM Modi-isa ashi.

Tanü PM Narendra Modi-isa India nüjiso atema raraba nung shilem agir ajak nem tetushi agütsü.

“Mahatma Gandhi kübok Non-Cooperation Movement aser Satyagraha Movement inyakba aser Bhagat Singh, Sukhdev o Rajguru nunger den iba mapang tasütait nisungtemi taküm bendanga agütsüba atema tetushi agütsür” ta pai ashi.

Taküm 77 buba Independence Day benjung nung adentsü atema linük kübok

Guwahati, August 15, 2023 (Agencies): Manipur sorkari Nagaland aser Mizoram tashi helicopter services tenzüktsü asüngdangba Centre-i agizükogo.

Churachandpur-Aizawl aser Kangpokpi/Senapati-Dimapur tashi helicopter senzütsü.

Manipur nung kin o kin

tesem balala nungi nurse 50 jaoka shilem agi.

“Covid ajanga asenok dang meimchir medeni alima renloka moutettsü ta sayuogo” ta Prime Minister-i nurses, doctors aser tangarem tushia jembidang ashi.

India nung Covid vaccine crore 200 tema agütsüba nung Anganwadi workers aser ASHA workers-i bendanga agüja inyakba atema tenüngsang agütsür, ta paisa ashi.

“COVID mapang aser iba sülen alima yariba ajanga India ya alima medemer ka kümogo” ta Modi-isa shisem.

Manipur nungi Nagaland & Mizoram tashi helicopter senzütsü takhangba agütsü.

Union Home Minister Amit Shah-i May 30 nü Manipur semdangdang IITLF-i pa dang helicopter senzütsü atema mepishi.

Manipur nung tang Imphal nungi Churachandpur aser Jiribam tashi passenger helicopter services lir.

tsüngda raratepba nung ajemdaker Centre-i iba temelaba agütsü. Helicopter services ajanga timtem ajurua aliba tesemtem aser tanga tesemtem tsüngda tesentaktep tajungba akümtsü.

Kuki-Zo nunger telok Indigenous Tribal Leaders Forum (ITLF)-i helicopter senzütsü

Assam nungi AFSPA agientsü; Sub-districts tentettsü: CM Sarma

Guwahati, August 15, 2023 (Agencies): Assam nungi Armed Forces Special Powers Act (AFSPA) agientsü ta Chief Minister Himanta Biswa Sarma-i August 15 nü metetdaksüogo.

Khanapara Playground nung 77 buba Independence Day amongdang CM Sarma-i "Assam district aika nungi AFSPA agienogo. State nung law & order tensa tajungba kümogo aser kubi meli Assam ajungalen nungi AFSPA agientsü" ta ashi.

“Assam nung ita ka tsüngda administrative reforms tulu ka

alitsü. Constituency shia nung Sub-districts tentettsü aser sub-district shia nung tongtipang department tem amenoktsü” ta paisa metetdaksü.

“Sub-district shia nung additional deputy commissioner kaka alitsü” ta CM Sarma-isa shisem.

State kübok tesem balala nung Independence Day mungogo



Mokokchung



Chumoukedima



Dimapur



Tuli



Changtongya



Mangkolemba



Tuensang

Dimapur, Luroi/August 15 (TYO): Nagaland nunga tesem balala nung August 15, 2023 nü India nunger 77 buba Independence Day munga liasü.

MOKOKCHUNG:

Mokokchung nung Independence Day ya Imkongmeren Sports Complex nung tejangraba tulu nung munga liasü. Iba sentong nung tesemdanger tongti ama Minister, Women Resources Development & Horticulture, Govt. of Nagaland, Salhoutuonuo Kruse dena liasü.

Iba sentong nung lai linük wako atsüketba den külemi Rashtriya salute agüja Independence Day o jembia liasü.

Iba sentong nung padade contingents ya DEF Mokokchung, 2nd NAP Alichen, 13th IR Battalion, Home Guards & Civil Defense, NCC MGHSS aser dangartem liasü.

Sobaliba tsüingsang aser pipe band ajanga iba benjongmung tali mera keta daksü aser Drug-Free Nagaland atema tenangzükba agia liasü.

Iba sentong nung Tekamera R. Keitzar, Jongpongola, Sanenchiba, Temjenyapang Ao aser Moanola Longchar densema nisung trok nem District Commendation Award for Meritorious Service agüja liasü.

LONGLENG:

Public Playground, Longleng headquarters nunga Independence Day tejangraba tulu nung munga liasü.

Iba sentong nung MLA A. Pongshi Phom tetushi tesemdanger ama arua dena pai linük nisang asong aser parade contingents tenet nungi Rashtriya salute agia liasü.

Kasa sentong nung S. Chingmei; Dr. Nurul Islam; ABSI K. Lipokmanen Phom; Lance Naik Sangtsou Khaimniungan; UBC K.Pangthong Phom; Supervisor Veterinary Department; Y. Alex Akai Chungkhong Scaleman; Food and Civil Supplies; M. Wanmei Phom; Medical Attendant District Hospital; Lance Naik Pongang Phom Village Guard; Bomngan Phom; OMS Jugali Power Dept; P Toshi, Duftry, Bautung Government Higher Secondary School Longleng; Limayangla Angangwadi Worker, CDPO; Tionsangba, Sweeper MTS, DRDA Longleng; Mola Phom Town Council and Bejila Self Help Group Yongnyah village

Department balala nungi nüburtem ajungtsü aser state ajangzüksüsa mapa tajung inyaker nem District Commendation Award 2023 agüja liasü.

nunger nem District Commendation Awards agüja liasü.

Iba sentong nung sobaliba yimya balala agi shilem agiba den exhibition matches asaya aser Police Station Longleng nung CCTV inoka liasü.

TUENSANG:

Tuensang District nunga linük meimba sayua 77 buba Independence Day sentong Parade Ground Tuensang nung agia liasü. Iba sentong nung alakteta jaoker ama Minister PWD, Housing, and Mechanical, P. Bashamongba Chang dena pai linük nisan atsüket aser DEF Tuensang, 3rd NAP Tuensang, VG Tuensang Village densema Parade Contingent 12 nungi rashtriya salute agia liasü.

Minister Chang-i anir Drug-Free Nagaland atema tenangzüktep agiba den külemi nisung balala nem District awards agüja liasü.

Sentong nung Changen Cultural Troupe, Sangli Cultural Troupe, Khiamniungan Cultural Troupe aser Kemifu Cultural Troupe ajanga sobaliba yimya balala nung shilem agi aser Tuensang School of Music ajanga ken tajung ka aden aser Tuensang Taekwondo Association ajanga martial arts yimya sayu GHSS Thangjam Choirs temi linük ken tena liasü.

Iba sentong nung ATMA aser Agri & Allied Department temi stall balala lapok aser Police Station Tuensang nung CCTV camera inoka liasü.

MON:

Mon Town nunga Independence Day ya Local Ground nung agia liasü, kong Minister, Power and Parliamentary Affairs, Government of Nagaland, K.G Kenye tesemdanger tongti liasü aser pai linük nisang atsüketa sentong tenzük.

Iba sentong nung Assistant Commandant K Hekato Sumi lenisüba kübok NAP Tizit, DEF Mon, Village Guard Mon Village, NCC of Konjong Higher Secondary School, Government Higher Secondary School, aser Wangkhao Government College nungi march past nung shilem agia liasü.

Department balala nungi nüburtem ajungtsü aser state ajangzüksüsa mapa tajung inyaker nem District Commendation Award 2023 agüja liasü.

WOKHA:

Linük ajunga den külemi Wokha district nunga 77 buba

Independence Day munga liasü. Iba sentong nung tongti tesemdanger ama Y. Mhonbemo Humtsoe, MLA, Government of Nagaland dena liasü.

Iba anogomung nungtem nung District Legal Services Authority (DLSA) ajanga Sub-Jail Wokha nung puoka alirtem nem chiyongtsü agütsü aser lokti tentet balalai mozüki semdanga liasü.

Kasa mapang tetsür telok temi sobaliba yimya dak sendakba saya balala saya aser Bethsaida School Wokha ajanga drill display sayua liasü.

PEREN:

Peren district kübok 77 buba Independence Day ya Deputy Commissioner indang office complex nung munga liasü, kong Minister, Health & Family Welfare, P. Paiwang Konyak-i linük nisan asong aser Independence Day o jembia liasü.

Iba sentong nung SDPO Jalukie Lunso aser Second in Command Viloto S. Chishi, ABI nati anir march past aliba nung school, college aser security forces nungi shilem agia liasü.

Iba sentong nung asem nem District Awards agütsü aser department balala, lokti tentet temi stall lapok.

Iba mapang District Hospital, Sub-Jail, Children's Home semdanga liasü.

ZUNHEBOTO:

Tanü Zunheboto district nung 77 buba Independence Day sentong nung tongti tesemdanger ka ama Jacob Zhimomi, Minister of Public Health Engineering & Cooperation dena liasü.

Tongti tesemdangeri linük nisan atsüketba sülen parade semdanga iba anogomung tenzük.

Zunheboto nung Deputy SP Phylumo ya parade commander aser Sihu Angami ya parade second-in-command sür contingents 13-i shilem agia liasü aser Minister Jacob Zhimomi-i nisung 32 nem District Awards agüja liasü.

Kasa anogo Zunheboto Police Station nung Minister Zhimomi-i CCTVs inoktsü aser temesepba mozü anema campaign tenzükja liasü.

DIMAPUR:

Dimapur nunga 77 buba Independence Day ya DDSC Stadium nung munga liasü, kong Advisor, Industries and Commerce, Hekani Jakhalu-i linük nisan songtsü aser Independence Day speech agüja liasü.

Iba anogomung mapang

Dimapur district kübok police station tem nung CCTV inok aser sorkar departments, Self-Help Groups (SHGs) aser Agricultural & Allied Departments temi exhibition stall lapoka liasü.

Iba anogomung paraden nung contingent 11 liasü, shirnok parade commander Shinde Suresh Kailasrao, IPS (Probationer), Officer in-Charge of East Police Station Dimapur, aser second-in-command Viketoulie (ABI Police Commissionerate Dimapur) nati anir agia liasü.

Parade contingents nung Police Commissionerate Dimapur, 15th NAP (IR) Mahila Battalion, Excise Directorate, Home Guard, Ex-Servicemen, NCC Dimapur, Government College, Government Higher Secondary School Purana Bazaar, Government High School Burma Camp, Greenwood Higher Secondary School Dimapur, NCC Holy Cross Higher Secondary School Dimapur, aser 43 AR Band Platoon liasü. Iba sentong nung shilem agir ajungai Drug-free Nagaland atema tenangzüktep agia liasü.

Iba sentong nung GHS Lengrijan, Living Stone Foundation International, aser Lorna Hr. Secondary School Dimapur nungi linük ken tena liasü aser Bethesda Hr. Secondary School Dimapur ajanga tsüingsang ka agi shilem agia liasü. Maneni Vungi Nzanta Cultural Club, Diphuphar ajanga sobaliba tsüingsang agi shilem agi aser 43rd Assam Rifles ajanga retreat ceremony agia sentong tembang.

TULI:

Tuli nunga Independence Day sentong public ground nung anepdang 9:00 ako nungi tenzük agia liasü, kong tongti tesemdanger ama Advisor, Fisheries and Aquatic Resources, Govt. of Nagaland, A. Pangjung Jamir-i linük nisan atsüket aser parade contingents nungi rashtriya salute agia liasü.

Iba sentong nung Christian School Tuli ajanga national anthem aten.

PHEK:

Phek Town nung Independence Day ya Advisor, CAWD and Taxes, Kudecho Khamo temaotsü nung munga liasü.

Advisor Khamo-i Nagaland nung temesepba mozü malitsü asoshi tenangzüktep ka agiba den külemi iba tebilemstü samatsütsü asoshi temolung agütsütsü jembia liasü.

Phek nung parade

contingents 19-i shilem agia liasü, kong Parade Commander, Assistant Commandant, 5th NAP Phek Lipokakum Jamir aser Parade Second-in-Command ABI Keviletou Soliezuo, DEF Phek aser Parade CHM HAV Pota Chakhesang, DEF Phek liasü.

Iba benjongmung nung sorkar department tenet, school ana, Phek Area Mother's Association, Nana Bakes Phek, aser Mama's Home Pickle ajanga exhibition stall lapoka benjongmung tali mera keta daksü.

Kasa sentong nung Phek District Veteran Football Association aser Officers/HODs tsüingta football exhibition match asaya liasü.

MANGKOLEMBA:

Mangkolemba nunga Independence Day sentong Public Ground nung ayongzükba liasü, kong Advisor, Transport and Technical Education, Government of Nagaland, Temjenmenba tesemdanger tongti liasü.

Advisor Temjenmenba ajanga sentong nung linük nisan atsüketba sülen parade contingents semdanga liasü.

Iba paraden nung E Coy 2nd NAP Tzutapela, Govt. Higher Secondary School Mangkolemba, Baptist Higher Secondary School Mangkolemba, aser St. Andrews School Mangkolemba nungi shilem agia liasü.

Tesemdanger tongti ajanga Independence Day nungtem nung o jembiba sülen Jawahar Navodaya Vidyalaya, Longnak aser St. Andrews School Mangkolemba nungi sobaliba yimya balala ajanga shilem agia liasü aser iba sülen exhibition stall tem lapoka liasü.

CHUMOUKEDIMA:

Linük ajunga den külemi Chumoukedima nunga Independence Day kanga mera keta Chumoukedima Town Public ground nung munga liasü. Iba sentong nung tesemdanger tongti ama Metsubo Jamir, Minister, Rural Development & SIRD dena pai linük nisan atsüketa parade contingents nungi Rashtriya Salute agia liasü.

Minister Metsubo Jamir-i Independence Day speech azungba sülen department balalai amenoka aliba exhibition stall tem semzükja liasü.

Iba sentong nung telok balalai sobaliba tsüingsang aser ken ajanga shilem agia sentong tali mera keta daksü aser ARTC & S, Shokhuvi ajanga sentong tembang liasü.



77buba Independence Day amungba anogo Ato Kilonser Narendra Modi-i o mejembi tsüingda guard of honour asadanga noksa nung angur.

Kharge-i Red Fort sentong nung shilem magi; Congress office nung linük wako salatsü

New Delhi, Luroi/August 15 (Agencies): Congress tir Mallikarjun Kharge-i Mongolbarnü Red Fort nung sentong nung shilem magi aser ashiba agi, pa Red Fort-i ao asübo security dak sendakba nung tenokdangba agütsür aliba ajnga pa party headquarters nung wako atsüketba sentong memenepla.

Iba sentong nung Kharge-i shilem magiba sülen Bharatiya Janata Party (BJP)-i arishi küm 81 tain yimden yimsüsür aser par party aitsüogo. Union information and broadcasting minister Anurag Thakur-i iba ajanga Congress tebilemdangba sayur, ta ashi.

Mongolbarnü social media nung lemsatepba minute 10 video ka nung Kharge-i, linük ya taoba küm ter tsüingda-ang renloker ta jembia aruba meyiptsüsü atema Jawaharlal Nehru nungi tenzüker Ato Kilonser balalai mapa tajung inyaka toktsübatem indang lemsatepa liasü.

"Kanga dang temulung korema tanü democracy, constitutional aser autonomous lokti tentettem amokmerendar, ta ni ashir. Opposition tem ola temseptsüsü atema hadir tasen amshidar," ta X sabang nung post asüba video ka nung Kharge-i ashi. "Kodang MP tem mapang telatetka makai suspend südir... Kodang Adani indang jembiba mapang opposition ola temseptsüdir... kodang mike tem shibangtsüdir onoki kechi inyaktetsü? Onok nübürtem den Independence Day amunger," ta pai ashi.

Kharge, shibai par kidang aser Congress headquarters nung linük wako salaja liasü pai item ken o kar lemsatepa liasü. "Parliament nung opposition MP tem suspend sütsür. Ni Parliament nung kodang o jembitsü nokdadir kü indang mic switched off sütsür," ta pai ashi. Congress headquarters nung sentong agiba mapang Rahul Gandhi aser tanga Congress lenirtemi shilem agia

liasü. Red Fort sentong nung shilem magiba indang asüingdangba mapang Kharge-i, pa tenük nung timtem lir aser pa par kidang aser Congress office nung linük wako salatsüsü lir ta ashi.

Kasa mapang nung Congress lenir Manickam Tagore-i ashiba agi, parnok Independence Day linük nung aliba nübürtem den mungogo.

Congress lenir tejen Pawan Khera-ia, Ato kilonseri o jembiba sentong nung ajak adentsüla asü masü, ta ashi.

"Sentong nung shilem magiba atema kechi tai ali. Ato Kilonser tesem kati ora lenmang kabo lir. Lenmang lapokba mapang tashi nungbo Congress headquarters nung wako atsüketba sentong atema onok menotsü. Ya kanga tongmelangbo masü. Ato Kilonser kechiba mepelar? Pai tepuokdak aliba lokti ka aginer asü? ni mangateter," ta Khera-i ashi.

Jharkhand Jaguar Force nungi sepai ana khaset

New Delhi, Luroi/August 15 (Agencies): State police kübok Jharkhand Jaguar Force nungi sepai ana West Singhbhum district nung Maoists purtem den khatepba mapang tepsetogo, ta police ketdangsür tejen kati metetdaksü.

Sepaitem aser telungpur tsüingda Hombar aonung menor Tonto police station temeket nung Tambahaka aser Sarjomburu yimtsüing tsüingda arem nung khatepa liasü.

"Sub-Inspector Amit Tiwari aser Constable Gautam Kumar na Maoists pur den khatepba

mapang tepsetogo," ta West Singhbhum Superintendent of Police Ashutosh Shekhar-i PTI dang ashi.

Iba tesem nung Maoists pur lenirtem mongzüka aliba indang osang tejangja ka angazükba sülen CRPF, Cobra, Jharkhand Jaguar aser district armed police longjemer meita aoba sentong ka ayongzüka liasü.

Security personnel tem aruba ngua Maoists puri parnok dak injang khaloktsü tenzüker aser iba sülen telok ana tsüingda khatepba mapang sepai ana tepseta liasü.

Kasa tesem nung anogo ishika tejakdang CRPF jawan ka tepsetba aser ka yiruba sülen anogo ishika lir iba lendong ya atalokogo.

District kübok Kolhan temeketnung Maoists pur lenirtem mongzüka aliba osang angazükba sülen January ita nungi tenzüka meita aoba sentong ayongzüka agia arudar

Tang tashi nung tai maketba yimdaklir teku taküm samaogo aser Tonto aser Goikera police station temeket nung IED rema toktsür pokdaksüba mapang nisung semer shi yiruogo.



Telangana Pradesh Congress Committee tir Revanth Reddy-i Hyderabad Gandhi Bhavan nung 77buba Independence Day sentong nung o jembiba noksa nung angur.

Himachal nung tzunglu dak sendakba lendong nung asür 55 jungogo

New Delhi, Luroi/August 15 (Agencies): Himachal Pradesh nung tzunglu kanga sashia aruba aser anentsüh aluba ajanga nisung 55 süogo aser aika ki chireper aliba aser anentsüh alur aliba nung nembanger alitsü ta bilemer.

Tzunglu kanga sashia arua anentsü aluba ajanga tongtibang lenmang aika nokdangogo aser kia aika chirepogo.

National Disaster Response Force (NDRF), Army aser State Disaster Response Force (SDRF)-i Summerhill aser Fagli nung anentsüh agi kongshir aliba tesemtem nung tekümzüka maparen balala benoka inyaksangshidar.

State kübok tang iba lendong nung district balala nung nisung taküm samaba aser kiojen chirep indang osang angazükogo. Asürtem rongnung Mandi district nungi parnok 19, Solan nungi 11, Shimla nung 14 aser Hamirpur nung nisung pezü asüba densema lir.

India Meteorological Department (IMD)-i taruba

ghonda 24 tsüingda Himachal Pradesh aser Uttarakhand kübok tesem balala nung tzunglu kanga tesashi arutsü ta takzütüogo. Met department-i state anaprongla atema "red alert" agütsüogo, koba mapang tatsüka lir "orange alert" kümtsüsü.

Met department-isa, state kübok Kullu, Kinnaur aser Lahaul aser Spiti dak alaka district 12 nungi teku nung Hombarnü tzunglu kanga sashia arutsü ta shiogo aser Mongolbarnü atema yellow alert agütsüogo.

India Meteorological Department-i state nung August 13 aser 14 nü tzunglu kanga sashia arutsü aser August 18 tashi maneni arutsü ta metetdaksür liasü.

Himachal Pradesh nung tzunglu kanga sashia aruba aser anentsüh aluba dak sendakba lendong 170 atalokogo aser ki 9,600 raksaogo. Taoba ita-a tzülung kanga sashia aruba sülen anentsüh aser tzümetstung lendong nung nisung 130 taküm samaogo.

Jharkhand CM-i 'Abua Awas Yojna' sentong tenzüksüogo



New Delhi, Luroi/August 15 (Agencies): Jharkhand Chief Minister Hemant Soren-i Mongolbarnü sen crore 15,000 alang 'Abua Awas Yojna' sentong tenzüksüogo, koba taruba küm ana tsüingda nung nungdaka aliba purtem atema ki yanglutsüsü asoshi lir.

Ranchi kübok Morabadi Ground nung linük wako atsükettsüba mapang Soren-i ashiba agi, par sorkari state tashi taitba küma yangertsü aser tenangzükbatem ataloktsüsü atema meranga arudar.

"Ni state nung alir ajak nem takdang asem aketba ki agütsüsü nangzükogo. Tenangzükba atalokja ni iba sabang nungi 'Abua Awas Yojna' scheme tasenba sangdonger. Taruba küm ana tsüingda sorkari sen crore 15,000 intoka nungdaka aliba purtem ki sütsüsü," ta Soren-i ashi.

CM-isa, pai aniba sorkari Jharkhand tashi ita kümdaktsüsü atema nangzükogo aser old pension scheme asüingsashiba, police tem leave benefits, kaketshirtem kakat shitsü bushitsü atema bendangleni yokba aser scheme balala nübürtem kishizüing tonga bener otsüba amala jenjang aika agiogo, ta ashi.

Paisa, mapa 38,000 atema

nübürtem shimtsü renema lir aser iba ajanga local tem ajangzükdaksütsü, ta ashi.

"Lanurtem skill development atema state kübok block 80 nung Mukhyamantri Sarathi Yojana tenzüker. Mukhyamantri Rojgar Srijan Yojana indang provision tem tezübaba kümdaktsüogo. Sorkar tenzükertertem mapang tatakzük nung promotion angutsü atema sorkari jenjang agiogo," ta pai ashi.

2022-23 fiscal nung pre-matric scholarship kaketshir lakh 33 nem sen crore 724 agütsüogo aser post-matric scholarship kaketshir 2.50 nem sen crore 315 agütsüogo.

Kaketshirtem tarutsü tajungba kümdaktsüsü asoshi tenangzükba agütsüba mapang Soren-i ashiba agi, sorkari kaketshirtem atema modern multistorey hostel tem yangludat kong modern library tem amenoktsüsü.

Paisa, aluyimertem ajangzükdaksütsü atema state sorkari scheme 88 benoka inyaksangshidar ta ashi.

Centre aija pai, state nung tsüingsarusa ajang timtem agütsüba mapang centre-i teyari shitak magütsü aser pai aniba sorkari iba tensa ya kanga junga meita atdar, ta ashi.



TIR YIMYIM YIMOBILEM (EDITORIAL)

DIMAPUR RASEMNÜ, LUROI(AUGUST) 16, 2023

Politics agi chiyongertem !

Ano Independence anogo ka süiogo. Independence tetezü yimten tsütsü tangar yimten kübok melii peisasa pei yimten yimli yangerteta litetba lima aser rongsen tsütsüa tangar dak nendaka melii peisasa pei taküm aser kibong taküm lia otetba nübortem ta angateter. Kodang asenoki Independence tetezü indangji bilemdangdir, atangji, asenok mulungjangi tasüngdangba aika arur. Aji oda, shitakba asenok Independence anogo amungtsü langa lir na ? Shitakba tangar kübok melii peisasa pei dak apet temzüng ozüng yangluteta otetba lima aser yimtenji asen lima aser asen government na ? Shitakba peisasa pei taküm aser kibong liteta aoba purtemji asenok na ? Asen lima nung asenoki linük wako atsüketa salem agütsüba tetezüji nüchi akümba tetezü asü, alar akümba tamaitü ? Iba wako jagi asenok longjemdaksü aser asenok kümzük ta akhüm agütsür asü ? Mesüra iba wako kübokji asenok alar kümer külemer? Tanübo asenoki item tetezü aser tiaji mejangjateti Independence anogo amunger. Aji oda, asenoki Independence anogomung nung amshiba aser chiyongba ajak tangari yanglubatem aser tangar lu nung züsentetba alia chiyonga jemer senshir aser ita trok lir külen tatar senden nung senotsü sentong benokdang asenoki aaba aser sarutetbabo kecha maka ser tangari agütsüba agia meperi taruba dang nungibo teindokba teimba ser agizüka ayutsüsa akümer. Iba tiaji kodang bilemdangdir, Nagaland nung alirtem rongnung Marwari aser Bihari nungertem kar daka alaka asenok Naga nungerbo tuluba nungi shir tilaba tashi kar party politics, kar electoral politics, kar Naga politics aser karbo Ceasefire politics agidang taküm alir ta asenoki angatetsü. Aji oda, Nagaland nung election magi nungbo Nagaland nung alir Naga nungerbo aika chisua athitsü aser nisung aika mapa maka akümtsü. Kasaji, Naga yimten teblemtsü ya koktetaka tatembang kati arunungbo Naga nunger yimten lenirtem jembitsüba onüka kecha makatsü amai Naga yimten teblemtsü onük agi yimten jenjang alangtetba purtem aika lir. Kasaji, 16 Point Agreement ya malika asüa, kechi onük ka jembia Nagaland nung Indian election ya agila ta bilemer ? Aji oda, asenok nüchisomung amungertem taküm aser kibong jenjang ya jungjunga bilemdangra, asenok ya pi dang kechi inyaka chiyonger ta ashitsü ? Election nung party politics jembia sen tera meshizüka yur relief jang angati meshia chiyonga asenok Independence anogo amunger asü ? Mesüra Naga nunger yimten teblemtsü aser ceasefire onük jembia-jembia yimten jenjang ka alangteta yur Independence amunger ? Asenok yabo pei lu nung züsentetba agi taküm alirtem masü saka politics agi chiyonga taküm alirtem lir. Aji agi kopiga otettsü ? Atangji, asenok aika ita sen achirtem lir saka ita sen agirtemji Independent masü saka "Dependent-tem' lir, anungji parnok asoshi Independence anogomungji balaka ratettsü. Aji oda, Independence anogomungbo amunger saka center government tsübuba agi asenok state assembly nung asenok dak apet ken o lemteptsü aser latettsü mekokra asenok asoshibo Independence anogomung amungba tetezü mali akümer. Joko, asenoka nüchi masü saka tamachi aser alar kumdaksüba politics dang jembia memungi asenoksasa asenok dak apet yimten jenjang latettetba aser asenoksasa asenok taküm litettsüsa rongsen poktetdaksüba politics dangi meyiptsüla. Tang asenoki jembiba party, electoral aser Naga politics yagibo asenoki Independence anogo memungtettsü. Aji oda, asenokbo linük wako nung salem agütsüba anogo ya nüchiso anguba anogo masü saka alari kibur külemba anogo ama kumadoktsü. Election nung asenoki politics tapu tapu jembia sen agi toktepba poltics ya Delhi nung alirtemi meteta lir, iba jagi parnoki asenok akhüm metsübur. Aji oda, asenoki parnok dang sen yong ayoker aser parnoki iba melen relief jang yoker. Iba jagi asenok tepelashi aser iba tepela o ji taoba election nung asenok leniri metetdaksüba asenoki angashiogo. Atangji, alar asoshibo moatsü dang khen shi den chiyongbaji tuluka aser tepelashi !

OLEMSABANG

MOTHER'S ASER FATHER'S DAY

(MESÜRA)

MOTHERS' DAY ASER FATHERS' DAY (KOBA SHIDAK?)

- A. M. TOSHI JAMIR, Dimapur

Taküm küm tetenzüklen tembar tajung kati itemya Telephone ajanga kü dang asüngdangba ni melangzütet. Ibaya kanga tongtipang onük ka ta bilema nia bushidangtsü (research) tenzük. Iba onük ya ni tongtetba tashi yangi zülur aser lapoka toktsür. Tanüngba temji, talisa Arogotem aser Tamangba lokti-tentet nung inyaker temeteteremi iba ocet den metenloka ano pei-peitabilemba tajungtem lemsatetep nungbo nübortem kanga tajangzük angutsü ta imlar.

Arogotem aser Tamangba Tentet balalai (Associations) küm shia Calendar/Calendar of Events adoka amshiba nung itemi ajenloker. Anungji koba shidak ta masü saka Asen Lima (talisa Nagaland nung) Arogotem/Tamangba Tentet-temi koba amasa zülua amshir itemi tama metetnü nung ishika (tebilemba tajung agi) bendenogo aser tsünglanglen sayur:

FATHER'S DAY / MOTHER'S DAY AMSHIRTEM (LOKTI, KIJA) ISHIKA YANGI AGÜTSÜR: (i) Mokokchung Town Baptist Arogo; (ii) Kohima Ao Baptist Arogo; (iii) Changtongya Baptist Church; (iv) Kangtsüng Baptist Church; (v) Mopungchuket Baptist Arogo; (vi) Changki Yimlang Baptist Arogo; (vii) Ao Baptist Arogo Shillong; (viii) Longpayimsen Baptist Arogo; (ix) Longsa Baptist Arogo; (x) Impur Baptist Arogo; (xi) Chuchuyimlang Baptist Arogo; (xii) Waromung Baptist Arogo; (xiii) Yimyu Baptist Arogo; (xiv) Nagaland Christian Revival Church, Changtongya; (xv) Council of Baptist Churches in North East India, Guwahati (CBCNEI); (xvi) Christian Revival Church (Nagamese), Karbi Anglong, Assam; (xvii) Immanuel A.G. Church Burana Bazaar-"B", Dimapur; (xviii) Amazing Worship Team (SBA), Sivasagar, Assam; (xix) City Church Kohima; (xx) Kidema Baptist Fellowship Kohima; (xxi) St. Thomas Church, Phelungre village, Kiphire district; (xxii) Aboi Town Baptist Church; (xxiii) Christian Celebrations by Smt. Imtjungla; (xxiv) Father's day-2023 by Rev. Fr. C. Joseph, St. Joseph college, Jakhama; (xxv) Khristaer Arogo, Bangalore; etc, etc.

FATHERS' DAY / MOTHERS' DAY AMSHIRTEM ISHIKA YANGI AGÜTSÜR: (i) Longpa Baptist Arogo; (ii) Japu Baptist Arogo; (iii) Dimapur Ao Baptist Arogo; (iv) Ao Baptist Arogo, Guwahati; (v) Ao Baptist Arogo Mungdang (office), Impur; (vi) Akhoya Baptist Arogo; (vii) East Dimapur Ao Baptist Arogo; (viii) Aitlenden Baptist Arogo; (ix) Khensa Baptist Arogo; (x) Changtongya Town Baptist Arogo; (xi) Ao Baptist Arogo, Padum Pukhuri; (xii) Mongsenyimti Baptist Arogo; (xiii) Mangmetong Baptist Arogo; (xiv) Ungma Baptist Arogo; (xv) Aoyimkum Baptist Arogo; (xvi) Nagaland Christian Revival Church, Mokokchung Division Church Council; (xvii) Baptist Church Changki; Rongpangmen Baptist Church; Asangma Baptist Church; etc, etc.

ANO, AROGO ISHIKA NUNG IBA AMAI BALAKA AMSHIBA NGUTET (saka tenüngbo magütsür):

(i) Mother's day/Fathers' day; (ii) Mothers' Day/Fathers Day (apostrophe mesayu); (iii) Fathers' Day /Mothers Day (apostrophe mesayu); (iv) Mothers' day/Fathers day (apostrophe mesayu); etc etc.

Sürapangla, Mother's Day/Father's Day ta zülua amshiba ya shidakba asü, mesüra, Mothers' Day /Fathers' Day ta amshiba ya shidakba? Ni bushitetba kar lemsateper.

English Grammar nung zülua aliba guide-rules len nungi tongmelang agi jembidi süra asenoki yamai ashitsü akok :Tetsü/Tebu ka indang züludang APOSTROPHE (') ji S jakdang enoktsüla ('S). Ano, Tetsütem/ Tebutem indang jembir süra APOSTROPHE (') ji S sülen zülutsüla (S'). Anungji Asen Lima nunga talisa iba nungji ajemdaker, Arogotem aser Temeteter-tem aikati, Fathers' Day/Mothers' Day ta amshitsübaji tuyur/pusemer. Aser iba amaji lokti aikati küm shia adokba Calendar/Calendar of Events nung Fathers' Day/Mothers' Day ta ajenloker amshir. Tetsü/Tetsütem aser Tebu/Tebutem Anogo tenzük munga aruba puti otsütem-ya junga mezüngdangi tebilemba jembidi asünungbo, grammar kaketi sayuba amaji Mothers' Day/Fathers' Day ta amshiba-jisa shidak ta shitettsü südi. Saka Mother's Day/Father's day ta kodaser amshitsüsa aküm ibajia jangja-a meteta alinungsa tajungba. Kechiaser iba jagi asenok tebilemba tera balaka melenshidaktsütsüa akok.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Manipur azüdokshi nung asürtem tribal Khristan temi aremtsü meranger

Imphal, Luroi/August 15 (Agencies): Manipur nung Khristan Kuki-Zo kin nungi telok kati tang azüdokshi nung asürtem külemi aremtsü sentong renemer, iba telemtetba yagi ano tensa tamajungba kumdaksü.

Indigenous Tribal Leaders' Forum ajanga asürtem ya külemi August 3 nü aremtsü sangdonga liasü. Saka India indang Home Minister Amit Shah-i mepishiba sülen sentong ya thinen aser sentong renemba mapang lir saka tasü mang aremtsü anogo tejangja ano mesangdongi lir, ta lenir kati ashi.

Mezüng sangdong ajanga tensa tamajungba kuma ano mepetmesü adok, kechiaser tasü mang aremtsüba tesem ya Hindu Meitei nung kubok aliba Bishnupur district aser Churhandpur district tsüngta "buffer zone" nung liasü, kong Kuki-Zo Khristanpur alir. Manipur High Court-ia item tasü mang aremtsü sentong anema obendang agütsü.

Ministry of Home Affairs nungi mepishiba sülen aser Mizoram Chief Minister Zoramthanga tetsüngtai aitba sülen ITLF ajanga iba sentong thinentü telemtetba agia tensa tajungba akum.

May 3 nungi tenzüka Manipur nung tang tashi kin ana tsüngda azüdokshiba mapang nisung 150 süogo aser 300 dak tema yiru, nisung aliba ki aser tekülem ki meyirijang aika raksatsü aser nisung 50,000 dak tema tesem balala nung jenshia lir.

Imphal aser Churhandpur kubok mozüki balala nung nisung tasü mang 87 shi mashishii yua lir. Lendong ajurutsü tetsübo nung kibong

aikati pei adianu aser kinungertem tasü mang mashishiteter aser kari tejashi nung tasü mang aremtsü memolunger.

Tawa Manipur nungi tribal lenirtem Union Home Minister Amit Shah ajurutsü Delhi-i ao aser parnok ajurutebpa sülen Kuki-Zo kin nungi tasü mang aremtsü asoshi danga tesem ka bushitsü, ta sangdong.

ITLF temi iba mapang takhangba pongu agütsü aser item rongnung nisung tasü mang aremtsü asoshi melatsü, Kuki-Zo nung alidak Meitei state security forces meyoktsü, Imphal nung mozüki ana nung Kuki nung tasü mang yua aliba meyiptsütsü, Manipur nungi Kuki-Zo nung aliba tesem balaka kumtsütsü aser Imphal nung tepuokdak yua aliba tribal nisungtem danga state temi yoktsü dena lir.

Kuki-Zo kin nungi nisung 130 tepsetaka Churhandpur kubok mozüki balala nung tasü mang 35 dang lir. Tasü mang aika Meitei nung timba aliba Imphal kubok mozüki tem nung lir, kong Kuki-Zo nung timba tepset.

Iba lokti aremba sentong ya agütsü ano hopta ana dak chia agütsü akok, ta tribal lenirtemi ashir. Imphal nung aliba tasü mang Churhandpur-i bener arutsü atar, ta ashi.

Taoba mapang Kuki-Zo nung nem agüja aliba teyari aser quota tem Meitei nung nem agütsütsü court ajanga totuyuba agütsüba sülen May ita tetenzüklen azüdokshi ya tenzüka. Iba totuyuba ajanga Meitei nungeri Kuki-Zo nung alidak ali alitsü temeden agütsü.

Nisung million 3.2 aliba Manipur state nung

rongrongshirong adokba ya national security tsütsüa tebilemtsü tulu liasü, koba Myanmar den arütsüa aliba state ka lir.

Kuki-Zo kin ya India nung Mizoram state aser ano Myanmar aser Bangladesh tashinung tesendaktep aliba mechi rara ya Manipur alema aotsü akok, ta tekum dangtsü shia aru. Manipur nung ethnic telok tulutem rongnung tanabuba jenjang nung aliba Naga tribal tem tekok kata dena maden aser parnoka iba mangatetep nung atsüoktsü akok, ta khuret lemsatepa liasü.

Kin ana tsüngta buffer zones benoktsü atema sorkari sepai, armed police aser danga security forces züngsem 50,000 shi yoka lir, ajisüaka Manipur nung aliba police ket nungi nok-nü 4,000 dak tema aser injang-bomb million tesadang jungnüa auyaogo, ta ketdangtsü temi ashir.

Taoba ita European Parliament ajanga pangzüng ka renemba nung Indian sorkari dang tekeraba nung Manipur nung yimjung tanaben lidaktsütsü ajungshia liasü.

"Hindu nung timba kumdaktsütsü asoshi yimten tsütsü nungia yarisema tasa balala yanglur ama bilemer aser telungpur tekok tem inyaksangshi tali akumer," ta pangzüng nung shia liasü.

Ajidang masü nisung tepsetba nung security forces teka lir, ta aija ketdangtsü dak tamang makai akum.

Meitei extremist telok Arambai Tenggol aser Meitei Leepun den külemi state police, commado aser Indian Reserve Battalion temi tribal Khristan pur amaker, ta Kuki-Zo lenirtemi aitsü.

ANO GO ABEN TSÜNGREM DEN

Kü Timtem Bilemtettang

T.Ken 119:153-160

Nisung shingaa o bendangdaki mouner, kuli asütsü mouner. Tai aketerji koda balaka tamajungba! Saka na tetendangba nung noktakra, na asoshi bilemtsür ka lir meteta alitsü junger. Ken züluri Kibuba den jembibaji ibai lir, "Kü tepu kümang, aser ni alangzükang: ne tenangzükba ama ni rok a asoa kümdakjangma" (t.154).

Asenok asoshi pukümer tulutibaji Tsüngrem lir. "Tsüngrem asenok den lira, shibai asenok anema arutsü?" (Rom 8:31). Hopta tsüngda asenoki timtem ajanga aotsü akok. Tangari asenok anema tiyazü osang adoktsütsü akok, jangra matemtsü tia ajurutsü akok, kechiaser asenok anemer lir. Ken ken tangari asenok mangatetba ajanga asenok anema jembitsür. Item ajakji nai tanü ajanga aotsü akok saka ne tetendangba mapang ne den Tsüngrem lir. Kodang na aser ni atitangdir, Pai bilemdanger aser asenok pu akümer.

Pai mangatettepji bentettsür. Kodang asenoki Tsüngrem dang sarasademdir aser shidir, "Küken o bilemdangang," Pai mapa inyaker. Pai asenok alangzükker aser kümzükker. Asenok aibelen mesüdaktsür aser tepuokdak meyutsür. Tsüngremi Pa nübur taküm timtem nungi kümzükker.

Asenok teimla samadang Tsüngremi yarir. Nai timtem ajurudang, na teimla makai akümtsü akok. Saka Tsüngremi na teyimla makaba jenjang nungi ajungketer aser Pai tashi agütsür.

Tanü kotak nung Yisui na asoshi mepishitsür. Pa ji ne kotaker Temepishitsür aser ne Temaba Putir lir. Na tatidang aser temenen nungi jenbuttsü asoshi pai ne nem taochi agütsür. Saka nai temenen menara ne temepishitsür dangi nai aotsü akok. Pai ne dang tai atoktsü, merüktettsütsü aser ne ken-o nung ne pu akümtsü.

Kodang tangari na timtemdaktsüdir, Tsüngremi amshidakjang. Pai na kümzüktsü aser na teimla makaba nungi temaleni ajungkettsü. Yisui na atema mepishitsütsü aser teibui tai atoktsü.

Canada Supreme Court-i arogo ana indang ken o jembishitsü memolung

Vancouver, Luroi/August 15 (Agencies): COVID-19 pandemic mapang khen asoshi tenokdangba agüja aliba nung aibelenba mechi Canada nung arogo ana aija aliba ken o tanaben jembishitsü asüngdangba Supreme Court-i magizük.

Taoba Brehostibarnü tongmelang agi obendang ka agütsüba nung March's Ontario Court of Appeal telemtetba ya Reopening Ontario Act kubok constitution nung aibelenba mali, ta Canada indang tematiba court ajanga ashi.

2021 küm tetenzüklen kilung nung nisung 10 aser kima nisung 25 adenshitsü mela aliba mapang Waterloo Region nung Aylmer's Church of God aser Trinity Bible Chapel nung tekülem sentong tulu agia liasü.

Pandemic mapang tekülem ki ana nung tenokdangba ashi mangai sentep sentong agia liasü. Iba mapang COVID-19 vaccine junga alem metenzüki liasü aser UK variant prokshiba mapang liasü.

Aylmer indang pastor Henry Hildebrandt densema arogo anaprong aser züngsemtem anema provincial law kubok ken o benoka liasü.

Aylmer arogo ya tenokdangba anema nokdaker akum aser linük nung mangatetep agi sünga akum. Iba arogo yagi mapang shia tenokdangba ozüng sülen manidaki 2021 küm May ita Superior Court Justice Bruce Thomas-i arogo ya khen atema shibangtsü totuyuba agütsü. Ajisüaka arogo züngsemtem tekülem ki kima adenshia

tekülem sentong agia liasü.

Ita pezü lir vaccine ngua akumba aser emergency tera salaba mapang Thomas-i tekülem ki shibanga aliba tala agientsü totuyuba agütsü.

Tekülem ki tanaben lapoktsü totuyuba agütsüba mapang Hildebrandt-i o jembidang, Tsüngremi agütsüba temeden wazüka ayutsü asoshi ni kü takum agütsütsüa molunga lir, ta shia liasü.

Ajisüaka arogo anati benokba ken o March 2022 nung angadang Superior Court Justice Renee Pomerance-i ashiba agi, item tenokdangba yagi tamangba yimsü temeden nung kongshiaka COVID-19 prokshia aoba ajemdaktsütsü mechi tenokdangba agütsüba ya tim dang lir, ta shia liasü.

Supreme Court-i iba ken o

tanaben mejembitsü telemtetba agiba ajanga arogo anema tanüngba ken o jembia temerenshitsü agütsü.

Hildebrandt aser arogo anema ken o ya Elgin County nung tanaben lapoktsü imlar, kong pandemic restriction laws sülen manidakba nisungtem dang senchi chia liasü.

2021 küm Church of God Easter Sunday sentong ka nung adenba mechi Elgin County nung tanaben lapoktsü imlar, kong pandemic laws anema jembir dang senchi sen \$10,000 chia liasü.

Lai iba ken o jembishitsü asüngdanga lir aser Ontario Court of Justice ajanga October ita jembitsü lir. January ita St. Thomas

nung November 2020 nung COVID-19 "freedom rally" ayongzükba mechi Lamont Daigle of Toronto dang senchi sen \$20,000 den ano province nung telok adenshiba nung tenokdangba agüja aliba nung aibelenba mechi sen \$5,000 tali achi. Iba sentong nung nisung 250 dena liasü.

Aser Aylmer nungi kidang dang alir tanur tetsü Kimberly Neudorf-i October 24, 2020 nü Elgin County town nung "freedom marches" ayongzükba nung nisung 100 nungi 150 tsüngta adenba aser November 7, 2020 nunga kasa sentong ayongzükba nisung 1,000 nungi 1,500 tashi adenba mechi senchi sen \$37,000 chia liasü.

Tangbo la New Brunswick nung oa alir.

AO OSHI ANGAZÜKDAK:
TANÜ ANGAZÜKTSÜBA OJANG



Rotu

(v) Rotu mapangbo kibong akümtsü mebilemer.

Rujemlang

(n) Okshi ayi agi yangluba tetsüng tepen nung teptsü atepba oset (tattooing instrument)

* Akhi mapangbo shi asütsü mozü kecha mamshii **rujemlang** agi züka teptsü atep.

OLONG PAITEP # 6607

1			2			3			4	
			5		6		7			
8										
			9							
	10									
									11	12
			13						14	
15										
						16				

TIPIEN

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T _ _ _ lu - (3)
- 10. Takdang temalen - (9)
- 11. Tesa _ _ _ a - (3)
- 13. Ajungbena temulungjang tonglonsü alu - (5)
- 15. Tejen lai nung tesayur - (5)
- 16. Tsüngsak-mopung - (5)

LANGTSÜNGLEN

- 1. Reprangdaksü - (4)
- 2. _ _ _ _ ur - (3)
- 4. Kiojen yangludak - (6)
- 6. _ _ _ _ _ _ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemtdak - (6)
- 12. _ _ _ _ adenshi - (4)
- 14. Tsünüsenbongtsü adokdak - (3)

OLONG PAITEP # 6606 TELANGZÜBA

TIPIEN :

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

LANGTSÜNGLEN :

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Taju, 21. Ano, 22. Onü,
- 23. Kua.



ALOKBA DOCTOR DEN



Alokba : Sir, ni ya tanga problem bo kecha malia saka ama-tari onsara bulua kümogo, khen check-up süangma.
Doctor : Kodang nungi ama-tari bulua tenzük?
Alokba : Shiba kechi ama-tariba aka?
Doctor : Oh, tanga test menüngdakal!
~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Kuki-Zo village volunteers-i Independence Day among



Imphal, August 15, 2023

(Agencies): Churachandpur district nung Kuki-Zo village volunteers-i August 15 nü 77 buba Independence Day mongogo.

Iba sentong ya Zomi Council Steering Committee ajanga ayongzüka among.

August 14 nü Kangpokpi district nung Committee on Tribal Unity Sadar Hills

(CoTU)-i Kuki-Zo volunteers den külemi Independence Day amongtsü osang metetdakja liasü.

CoTU ya lisopurtem longjemtsü atema inyakba telok ka lir aser Defence Department den külemi tanga CoTU departments aser Kuki-Zo nung den külemi Indian Independence Day among.

"Mangatetep liaka Committee on Tribal Unity-i linük ajunga den külemi Indian Independence Day nung shilem agitsü lemtet" ta CoTU Media Cell züngsem Janghaolun Haokip-i ashi.

Haokip-isa Kuki-Zo nung dang CoTU Defence Department kübok benjungmong nung adentsü pelashishia jaok.

Mizoram nung Manipur nungi nisung 12,607 jenoka lir

Aizawl, August 15, 2023

(Agencies): Mizoram state sorkari Centre dang Manipur nung jena arurtem yaritsü atema Rs 10 crore teyari meshi ta Chief Minister Zoramthanga-i ashi.

August 15 tashi nung Manipur nungi nisung 12,607 tashi Mizoram nung jenoka lir. Parnok rongnung nisung 2,765 tashi relief camps balala nung lir aser tanünga 9,842 tashi tangalen anenzüka lir ta State Home Department-i metetdaksü.

"Taküm May ita tetenzüklen

nungi Manipur nung tensa mejungi akümba atema süoki ia bilemer. Iba mepetmesü ajanga Mizo loktiliba dak kongshiogo aser Mizo nung aser talisa kaketshirtem kümzüka ayutsü atema mapa inyaka arudar" ta Mizoram Chief Minister Zoramthanga-i Independence Day onük jembidang ashi.

"Asen putiotsü piyong Mizo nungeri tayongzükba balala ajuruba ajangeta aruba sayur. Ajisüiaka kidanger state Manipur nung atalokba lendong ajanga Mizo loktiliba ajak nung kongshiogo" ta pai ashi.

Mizoram sorkari Mizoram tensa kanga junga repranga arur aser Mizoram nung arua jenokba Mizo nung nem teyari balala agüja arur. Tang tashi nung foodgrain 2,388.50 quintals tema agütsüogo, ta CM Zoramthanga-isa ashi.

"Iba tebilemtsü atema Mizoram sorkari relief and rehabilitation efforts nung amshitsü Rs 5 crore lemtzksü. Maneni civil societies, non-governmental organizations, arogotem aser kijatemi tenla balala agütsüba atema kanga pelar" ta paisa shisem.

Assam tzümetsüng nung nisung 2 asü; 65,500 timtemer

Guwahati, August 15, 2023

(Agencies): Hombarnü Assam nung tzümetsüng ajanga nisung 2 asü aser district 7 nung nisung 65,500 timtemer.

Sonitpur district kübok Chariduar nung nisung ana asü ta Assam State Disaster Management Authority (ASDMA)-i metetdaksü.

Assam nung taküm tzümetsüng timtem ajurur nisung 14 tashi süogo.

Chirang, Darrang, Dhemaji, Dibrugarh, Kokrajhar, Sivasagar aser Sonitpur district tem nung nisung 65,600 tema tzümetsüng ajanga timtemer ta ASDMA bulletin nungsa shia lir.

Deobar tashi nung nisung 75,200 tema timtema liasü. Tzümetsüng agi kanga mejungi kongshiba district ji Dhemaji lir. Iba district nung nisung 31,000 tema dak kongshia lir, parnok

sülen Sivasagar (29,300) aser Chirang (2,200) lir ta ASDMA-isa metetdaksüogo.

Ketdangsürtemi Sivasagar nung relief camps 7 lapoka lir aser item nung nisung 1,329 jenoka lir. Ketdangsürtemisa district 6 nung relief distribution centres 20 lapoka lir.

Assam nung tang yimtsüng 316 tzi agi metsüngbanga lir aser 5,743.09 hectares nung alu raksaogo ta ASDMA-isa ashi.



77 buba Independence Day nungtem nung Dimapur District Citizens' Forum nungi DDCF General Secretary, Richard Haolai, Vice President, Temsupok Jamir aser Youth Convenor, Zhekato Yeptho nungeri anir August 15, 2023 nü Sharon Home of Hope, Burma Camp semdanga jang bag ana, dal bag ka aser nanglong talep agüja liasü.

Thailand: Move Forward Party-i Pheu Thai den alliance yanglutsü memolunger



Bangkok nung general election mapang Move Forward Partypur noksa ka angur.

Bangkok, Luroi/August 15

(Agencies): Thailand election akokba Move Forward Party-i taoba alliance partner Pheu Thai ajanga taruba sorkar kumtetsü merangba nung yaritsü memolungi lir.

Mitkari aniba aser yariba sorkari küm toku yimsü sia arur May 14 election nung progressive Move Forward party ajanga takok anguba ya taoksatsüka liasü, aser parnok sülen Pheu Thai liasü.

"Tang sorkar tentetsü ya nüburttem ola nung mesayur aser election nung nüburttemi molungba raksatsür," ta Move Forward Secretary-General Chaithawat Tulathon-i Mongulbarnü osangbener senden ka nung ashi.

Mitkar lenirtem tashi tulu aliba bicameral parliament ajanga taoba ita anaben ato kilonser akumtsü merangba Move Forward lenir Pita Limjaroenrat magizükba sülen

parnok tsungta alliance ya raksa.

Pheu Thai ya taoba Ato Kilonser Thaksin Shinawatra den sendaktepa aliba party ka lir aser National Assembly nung Move Forward ajanga anaben sorkar tentetsü merangba nokdanga ayuba sülen taoba hopta parnoki sorkar tentetsü merang.

May ita election nung opposition party temi mitkari yariba yimden yimsüsür madak takok anguba sülen iba Southeast Asia linük nung yimtenren koloni aotsü mejangjai lir.

Pheu Thai yagi sorkar anitsü asoshi Move Forward nem tetsükdaksü agütsür, ta aikati aitsür.

Ajisüaka Move Forward ajanga takok mangutsü ta tejangja metetba sülen parnok atsüngzüka ao ta Pheu Thai ajanga ashir.

Taoba mapang mitkar den tesendaktep mejungi liaka Pheu

Thai yagi party balala aser sepai lenirtem den sendaktepa aliba senator teyari bushia kanga meranga asayar.

"Iba ama jenjang nung sorkar tentetba nung onoki shilem maginer," ta Move Forward nungi Chaithawat-i ashi.

Ato kilonser atema Pheu Thai yagi Srettha Thavisin shimtsü, shiba taoba mapang shishilempar tetsüti ka liasü aser election masüdüng yimtenren nung shilem kecha meliasü. Takok angutsü asoshi Srettha-i lower house aser upper house lungjemer züngsem timbai yaritsüla, saka aji tamakoktsü.

Pheu Thai lenir Cholnan Srikaew-i prime ministerial vote ya August 18-22 tsungta agitsü imlar aser Move Forward teyari medeni Srettha-i takok angutsü, ta ashi.

"Move Forward telemetba onoki akumtsübor aser onoki party ajak den inyaktetsü," ta pai ashi.

Pak caretaker PM inyaktsü Anwaarul Haq Kakar shimogo

Islamabad, Luroi/August 15

(Agencies): Hombarnü linük nüjiso ngur küm 76 ajungba anogo nung tibuba Pakistan caretaker prime minister inyaktsü atema Anwaar-ul-Haq Kakar-i mapa agizükogo.

Tir Arif Alvi-i achaayanga Kakar tenangzüktepba agi, kong taoba Ato Kilonser Shehbaz Sharif, ex-cabinet züngsemtem aser sepai tekolaktemi shilem agia liasü.

Hombarnü Senate mendenbuba Sadiq Sanjrani-i senator ka ama Kakar indang resignation agizükba liasü. Maneni Kakar-i the Balochistan Awami Party (BAP) nung pa mapa toktsüogo, koba pa den tangar kari 2018 küm military-i teyari agüja tenteta liasü.

Interim PM ka ama pa asoshi mezüngbuba mapaji linük inyakyim achaayangtsü atema cabinet ka shimtsü asoshi asütsü. Ajisüaka taoba PM-i August 5 nü digital census



indang result ka agizükba general election menor agitsü atema mepaitokteti akümba sülen interim PM mapa ya kanga tongtibang kümogo.

Taoba ita Pakistan Parliament-i caretaker sorkar nem rongsenketzüng dak sendakba nung tongtibang telemetbatem agitsü atema election temzüng ozüng yanglushiogo aser iba ajanga temzüng ozüng kübok election ita asem tsüngda agitsü asoshi tetuyuba agütsür aliba dang nungi mapang talangba atsülanga aotsü akok ta bilemer.

Taoba PM-i August 12 nü term metembang tsüngda taoba

hopta National Assembly loksatsüogo aser iba ajanga caretaker sorkar nem election atema renemtsü asoshi anogo 90 mapang agütsüogo, koba temzüng ozüng dak ajemdaker pa mapa mapang shitak nung dang toktsü asübo anogo 60 dang süla.

Pakistan nung ketdangsurtemi taküm general election agitsü atema memulungi arudar. Pakistan Tehreek-e-Insaf (PTI) mendenbuba Imran Khan PM mapa nungi aginba sülen Pakistan yimden yimsüsüba nung mepetmesü tulu adoka arudar aser Khan ya taoba hopta küm asem tepuokdak ayutsü atema obendang agütsüogo.

Kasa mapang nung Khan küm pongu tashi election nung shilem magitsü atema tenokdangba agütsüogo. Ajisüaka pai tang o kadak pa tepuokdaki yokba dak sendakba nung temepeshiba agütsür lir.

OFFICE OF THE DIMAPUR MOLUNGYIMSEN SENSO TELONGJEM

TENÜNGSANG AGÜTSÜR

Molungyimsen nung senso tajung anati konang-nüngsang bentsür aruba atema tenüngsang agütsüba den pelaba lemsateper.

1. Asür Wb. R. Kikum Mozür aser asür Wt. Amenla na jabaso **Hav.Talireba Mozür**, (Office of the Commissioner of Police)-i Independence Day 2023 nung Governor's Commendation Certificate 2023 anguba atema.

2. Wb. Maken Sanglir aser Wt. Narola na jabaso **Jason Sanglir**-i Business Association of Nagas (BAN) nung Executive Director (ED) inyaktsü jenjang ngutetba atema.

Tsüngremi nüna maneni len aniang ta DMST-i moatsür.

Sd/-
T. Alemba Jamir
Tir, DMST

Sd/-
Imkong Tangit Aier
Tongti Tezulur, DMST

Russia: Petrol station ka nung mi adok; nisung 30 asü

Moscow, Luroi/August 15

(Agencies): Russia kübok Dagestan nung petrol station ka nung mi adoka apokba sülen tanur asem densema nisung 30 süogo aser nisung 100 dak tema yiruogo, ta local ketdangsurtem aser osang kaket balala ajanga metetdaksü.

Mi ya Hombar aonung Dagestani yimtiba Makhachkala nung highway tezülen gari yangluba tesem ka nung adok aser petrol station kati jangroloka ao, ta Ketdangsurtemi Mongolbarnü metetdaksü.

Russia indang Emergency Ministry-i Mongolbarnü sangdong ka ajanga ashiba agi, iba lendong nung nisung 105 yiru aser nisung 30 süogo. Asürtem rongnung parnok asembo tanur liasü ta Dagestan Angh Sergei Melikov-i ashi.

Hombar aonung 9:40 nung iba station poka liasü, ta Melikov-i Telegram messaging app ajanga metetdaksü.

Lendong nung kanga mejungi yirur alirtem Moscow-i anir aotsü atema

Makhachkala-i tayimtsü ka yokogo, ta Russia indang Emergency Situations Ministry-i Telegram messaging app ajanga metetdaksü.

Lendong nung yirur alir nisung 105 rongnung tanur terasem densema liasü, ta Russia indang Interfax news agency-i metetdaksü.

Tenük kuli agütsür kati ashiba agi, mi ya gari anendena aliba tesem ka nungi tenzük aser iba sülen petrol station nung jangrolok.

"Iba tesem nung langka apokba sülen onok kolak nung ajak tsük aser onoki kecha mongui aküm," ta tenuk kuli agütsüri ashi.

RIA news agency-i Telegram nung post asüba video ka nung langka tuluka apokba sülen ki ka nungi mi atokba sayuogo. Mi ya square metres 600 shi jangroyonga ao, ta ministry-i ashiba den mibener 260 yokogo, ta shisem.

Mibenertemi mi temseptsü atema ghonda asem dak tali agia liasü, ta TASS state news agency-i metetdaksü.

Hopta ka tsüngta Ecuador nung yimten yimsüsür tanabuba tepsetogo

Quito, Luroi/August 15

(Agencies): Ecuador nung party lenir ka tepsetogo, anungi iba linük nung hopta ka tsüngta yimten yimsüsür tanabuba tepseter alitsü.

Pedro Briones ya northern Esmeraldas province kübok par kidang lia prangbong bena alirtem motorcycle ka nung arur khaset.

Linük yimtiba Quito nung presidential candidate Fernando Villavicencio khaseter anogo pongu dang lir Briones ya khaseter.

Ecuador nung mapa tamajung inyakba telok balalai international crime cartels den tesendaktep yangluba ajanga iba linük nung nisung tepsetba tali akumer.

August 20 nü tir election agitsü lia yimten yimsüsür tepsetba ajanga linük anokshitsür.

Briones ya Esmeraldas nung left-wing Citizen Revolution Party lenir liasü. Aser külem party züngsem temi par kinunger den asükhu lemsatepogo.

Iba party nungi presidential candidate Luisa Gonzalez-i ashiba agi, Ecuador nung azüdokshi mapang lir. Citizen Revolution Party tentetsang aser taoba tir

Rafael Correa-i sangdong ka nung, "Parnoki Esmeraldas nung ano külemi mapa inyaker ka tepsetogo. Ojangji ojang!" ta ashi.

Briones khasetba atema police nungi osang kecha sangdonga mali saka yangji aliba osangbener temi ashiba agi, prangbong bena alir nisung ana motorbike nung arua Esmeraldas yimti south tsütsü San Mateo nung Briones khasetba sülen jena ao.

Ajisüaka tang tashi kechi nukjidong nung iba mapa inyaker ano mejangja.

Esmeraldas province ya Colombia den arütsü lir aser azüdokshi agi tesashitiba kongshiba tesem ka lir.

Colombia den arütsü aliba aser Pacific tzükum nung aliba ajanga iba province nung temesepba mozü shibelener temi kanga sapua Colombia nungi Ecuador ajanga US aser Europe leni cocaine shibelener.

Ajisüaka Esmeraldas nung azüdokshi maziokteter. Taoba ita Manabi province kübok Manta yimti indang mayor ka public works project semdangba mapang khaset.

World Cup: Spain-i goal 2-1 agi Sweden koka final-i iogo



Luroi/August 15, 2023

(Agencies): Asaya atemtsü lia Olga Carmona-i Spain atema goal ka idakja parnoki goal 2-1 agi Sweden madak takok nguogo aser tang mezüngbuba Women's World Cup final ka tongtetogo.

Mongolbarnü Eden Park nung asaya repranger 43,217 matsüngdang Sweden atema Rebecka Blomqvist-i goal ka idakja team ana goal kasasa akümba sülen minute ana lir minute 90buba nung Carmona-i talang nungi metsüba ball ka goal telungi ia Spain nem takok agütsü.

Asaya nung mezüngbuba goal ya Salma Paralluelo-i minute 81buba nung Spain atema idakja liasü aser iba ajanga asaya kümümba kümdaktsü. Salma-isa Netherlands den quarterfinal asayaba mapang kanga junga asaya liasü.

Asayartemi longkak aiba ajanga Spain team mepetmesü

tulu aiba sülen küm ka majung tsüngda parnoki Deobarnü takok marok ajungkettsü asoshi maongka ngutetogo. Final nung parnok Australia mesüra England den asayatsü.

Bodhbarnü tanabuba semifinal nung tamakok anguba team Sweden den Honibarnü tasembuba jenjang atema asayatsü.

Sweden team küm pezü tejakdanga semifinal tonga asayaogo aser taoba kümba European Championship nung semifinal tonga asayaogo aser takümba maneni semifinal majangteti tsükogo.

Mongolbarnü asaya nung Sweden team-i kanga junga defend süa asaya aser team anrongnung Spain team tekümkümba liasü, ajisüaka parnok goal idaktsütsü maongka nguteta masaya.

Spain atema Full-back Carmona-i minute 14buba nung talang nung goal idaktsütsü merandang ajisüaka tezüluni

metsütok aser midfielder Aitana Bonmati-ia box tema nungi metsüba ball goal tezülü oadok.

Asaya tanabuba shilem tenzüker minute ishika tsüngda Nathalie Bjorn-i ball kanga junga agizüka Fridolina Rolfo nem ball agütsü ajisüaka lai metsüba ball ya Spain keeper Cata Coll-i kanga junga nokdanga liasü.

Asaya nung minute 70buba nung Paralluelo-i goal ka tera agi dang midaktsü.

Iba sülen minute 11 lir Paralluelo-i Spain atema mezüngbuba goal idakja liasü. Mezüngbuba goal idaktsüba sülen Sweden asoshi timla maka ama aküm ajisüaka Lina Hurtig-i tekolak agi Blomqvist nem agütsüba ball ka lai aibelen mesüi idakja goal kasasa aküm.

Asaya mapang apuloktsür asayatsü ama bilema aliba mapang Carmona-i Spain atema tanabuba goal idakja parnoki asaya koka liasü.

Kerala Blasters-i Milos Drincic alizükogo

Luroi/August 15, 2023

(Agencies): Kerala Blasters-i Hombarnü sangdong ka ajanga Montenegro nung arishi küm 24 tain centre-back Milos Drincic den küm ka atema tenangzüktepba yangluba sangdongogo. Milos-i Montenegro aser Belarus top tiers nung asaya 230 shi nung asayar lir.

"League tanga ka nung team tajung ka nungi tajangshiba tasen ka asoshi iba ya maongka tajung ka ta bilemer. Karolis den mezüng jembiba mapang nungi jangradema bilema liasü. Kü indang career nung jenjang tasen ka agütsü atema yongya atar aser ni teti bilemetsüsa asayatsü imlar. Ni takokba tashi tajungtiba asayatsü ta tenangzükba agütsür," ta Milos Drincic-i ashi.

Drincic, shiba tatemsa Belarus nung Shakhter Soligorsk nungi asaya liasü pa 2016 küm Montenegro nung FK Iskra Danilovgrad nungi asaya professional career tenzüker. Top-division nung kanga junga asayaba sülen pa 2021 küm Sutjeska Niksic nung oa aden.

2022 küm pa Sutjeska Niksic nungi asayaba mapang championship koka liasü. Lanur asayar shiba UEFA Champions



League aser Europa Qualifiers amala tongtibang asayamung nung asayaogo, pa Montenegro U17, U19, aser U23 team tem nungia asayaogo.

"Milos Drincic ya onoki aginüa bushia aliba asayar ka lir, shiba dak meranga asayatsü atema temlungtetba lir, shiba lanur ka dang aser Europe nung temaba jenjang nung asayaba league tem nung asayaogo aser Kerala Blasters tenüng nungi asayatsü atema tejangraba tulu lir. Onoki pa alizüktsü asoshi kecha atidak maliasü. Mapangbo tatsüka agiaka Milos onok den densemba atema pelar. Pa Kerala Blasters nung tongtibang asayar ka akümtsü imlaja atar," ta Kerala Blasters Sporting Director Karolis Skinkys-i ashi.

Milos Drincic jersey number 15 asemtsü aser pa teammate tasentem den Kolkata nung adentsü, shirnok tang 132buba Durand Cup nung shilem agidar.

Bumrah-i aniba India team Ireland-i apusoa ogo



New Delhi, Luroi/August 15

(Agencies): Jasprit Bumrah-i aniba India team T20I asaya asem asayatsü asoshi Mongolbarnü Ireland-i apusuaogo.

T20I asem asayatsü aliba ya Malahide, Dublin nung August 18 nü tenzüksü aser iba sülen kasa tesem nung August 20 aser 23 nü tanungba asaya ana asayatsü.

Board of Control for Cricket in India (BCCI)-i social media sabang balala ajanga India team Ireland-i apusoa aoba noksa lemsatepogo.

Official BCCI Instagram account nung tongtibang asayar Bumrah, Ruturaj Gaikwad, Prasad Krishna, Rinku Singh, aser Shivam

Dube nung tangokba noksa ka lemsatepogo.

Bumrah mapang talang ka lir iba asayamung nung mezüngbuba asayatsü lir. 2022 küm England den asayaba mapang pa tesüsa asaya aser teberem yiruba ajanga pa mapang talangka masayai aruogo. Iba asayamung ya Bumrah lenisüba nung asayatsü atema nongloktüogo.

India team nung asayartem yamai alitsü:

Jasprit Bumrah (Captain), Ruturaj Gaikwad, Yashasvi Jaiswal, Tilak Varma, Rinku Singh, Washington Sundar, Shivam Dube, Shahbaz Ahmed, Sanju Samson, Jitesh Sharma, Ravi Bishnoi, Prasad Krishna, Arshdeep Singh, Mukesh Kumar, Avesh Khan.

Vinesh Phogat Asian Games nung masayatetsü

New Delhi, Luroi/August 15

(Agencies): Vinesh Phogat, shiba nem Asian Games nung indang indanga asayatsü atema maongka agüja liasü, lai la Hangzhou nung taruba asayamung nung shilem magitettüsa akümba metetdaktüogo. La temekok yirur surgery agütsüsa akümba ajanga masayatetsüsa kümogo.

Vinesh aser Bajrang Punia na Asian Games trials nung masayadaktüsü indang indanga asayatsü atema maongka agütsüba atema mepetmesü tulu adok aser iba telemtetba agiba atema ad-hoc panel aija liasü.

Tia maka Vinesh tang iba asayamung nung masayatetsüsa kümogo, koba September 23 nü nungi Hangzhou nung asayatsü.

Vinesh-i X sabang ajanga iba osang ya lemsatepa liasü. "Ni tejashitsü osang ka lemsatepner. Anogo ka ana tejakdang August 13 nü training agiba mapang ni



temekok tabelen yirua liasü. Scan agia tendangba sülen doctor temi taneptsü angutsü atema surgery agütsüba dak alaka tanga lenmang kecha mali ta ashi," ta Phogat-i ashi.

"Ni August 17 nü Mumbai nung surgery agütsü. Ni 2018 küm Jakarta nung anguba Asian Games gold medal tanaben India atema angutsü kü nükjidong liasü. Ajisüaka tia maka ni yiruba ajanga masayatetsüsa kümogo," ta laisa ashi.

Vinesh aser Bajrang Punia na nem Asian Games nung

asayatsü atema maongka agütsüba atema Panghal aser Sujit Kalkal nati okadak ken o benok ajisüaka High Court-i tena temepeshiba magizük.

Panghal-i, 53kg trial akok aser Vishal Kaliraman-i 65kg category koka liasü. Tenaprongla iba asayamung atema reserve asayar ama shimmer liasü.

Vinesh-i ashiba agi, lai ken o dak sendaka aliba ketdangsurtem nem osang agütsüogo, ajita asünungdang reserve asayartem Asian games-i yoktetsü.

Arishi küm 19 tain Panghal shiba tang Jordan nung U-20 World Championship nung shilem agidar, la women's 53kg category nung India tenüng nungi asayatsü.

Osang ajanga ashiba agi, Punia-a training agi tenzüker. Mongolbarnü pa Sonapat nung Navy indang Raipur training centre nung training agia liasü.

BILEMDANGANG

"Peisasa pei tia jenjang melenshitsü koka lir."